



Walter Schlegel, il cumandant da la polizia chantunala, ha infurmà ier ils meds da massa e confermà che la polizia saja pronta per la segirezza durant ils dis dal Forum mundial d'economia.



Tavau è da preschent ina vaira fortezza pervia da las controllas da polizia e militar.

FOTOS G. N. STGIER

«Pronts er en cas d'urgenza»

Forum mundial d'economia 2016

DA GION NUTEGN STGIER / ANR

■ **Polizia ed armada èn pronts per lur servetsch da segirtad tar il Forum mundial d'economia FEM che cumenza damaun a Tavau. Las controllas vegnan augmentadas er senza avoir indizis concrets sin attatgas explosivas e terroristicas.** Dapi il 1971 stat Tavau a la fin da schaner en il center da la politica internaziunala cun avoir lieu il Forum mundial d'economia, il FEM. Da damaun fin dumengia proxima tschertgan bunamain 40 schefs da stadis, rotschas da ministers, personalitads da l'economia, da la scienza e da la cultura soluziuns per meglierar noss mund. Tranter la blera prominenzia politica sa chattan er vers 100 uschenumnads «VIP's», che han il dretg d'in schurmetg personal. Tranter auter segna la polizia chantunala er per la

segirezza persunala da *Joe Biden*, il vice-president dals Stadis Unids da l'America. Polizia ed armada segnan dentant er per la segirtad da tuts ils auters 2500 participants dal Forum mundial d'economia ed er per la populaziun da Tavau.

Sustegn da policists da l'entira Svizra *Walter Schlegel*, il cumandant da la polizia chantunala, discorra bain d'in privel pli aut tar la 46avla ediziun dal Forum mundial d'economia, però betg dad indizis concrets. «Gia suenter las attatgas explosivas e terroristicas il november passà a Paris avain nus reagì cun intginas mesiras da segirezza en vista al Forum mundial d'economia», ha ditg *Walter Schlegel* ier a Tavau. El ha er ditg che actualmain sa preschentia la situaziun calma er cun betg exister plans concrets d'attatgas terroristicas ubain explosivas.

En cas d'urgenza sajan polizia ed armada pronts da reagir er grazia al rinforz dad intgins tschients policists da l'entira Svizra. Quels hajan tuts ina scolaziun supplementara en il cumbat cunter terror. A Tavau, dentant er sin las staziuns pli grondas sajan la preschientscha e la controlla da la polizia gia dapi intgins dis pli rigurusas e quai saja cunzunt er durant ils dis dal Forum mundial d'economia il cas.

Er il servetsch da novitads da l'exteriur è involvà

Walter Schlegel ha ditg che la polizia chantunala collavuria ferm cun tuts ils servetschs da segirtad da la Svizra, lura er cun quels da las naziuns vischinas e cun ils impurtants servetschs da segirezza da l'entir mund. «Las forzas da segirtad da l'exteriur han però nagina influenza di-

recta sin nossa lavur, d'ademplier sajan be intginas obligaziuns», ha accentuà *Walter Schlegel*. La pli gronda sfida per la polizia saja cunzunt da porscher als uschenumnads «VIP's» la segirezza duaivla. Quai sajan ils schefs da stadis e da regenzas e las persunas da chasas roialas. A Tavau existan durant il Forum mundial d'economia quatter zonas cun ina segirtad superiura. Quai èn il center da congress ed ils hotels «Ameron», «Belvédère» ed «Inter Continental». Controllads vegnan ils automobilists e lur passagiers sin via en direcziun Tavau e quai da la vart dal Partenz sco er da la Val Alvra. Sche la polizia fa controllas han els da s'identifigar e quai senza commentari.

46 km elements da saiv

Sustegnida vegn la polizia ferm da l'armada svizra cun ina truppa da 4500

schulds da professiun. Sco ch'il divisiunari e cumandant dal servetsch da militar *Jean-Marc Halter* ha ditg sajan vers 3000 umens adina en funcziun durant ils dis dal Forum mundial d'economia. L'obligaziun principala da l'armada saja cunzunt da controllar il spazi da sgular enturn Tavau (46 km), il traffic aviatic e lura er da sgular cun helicopters las personalitads internaziunals da Turitg ubain da Dübendorf a Tavau. Fin a Turitg e Dübendorf vegnan las persunas prominentas cun lur agens jets privats. In ulteriur pensum da l'armada èn er il schurmetg da numerus objects a Tavau ed il schurmetg da persunas. 46 km elements da saiv èn vegnids montads, sin via èn durant il FEM 400 camiuns e 780 autos u bus pischens.